



Jadual Pembacaan Khutbah Jumaat

Siri 7/ 2023 (Bulan **JULAI** Tahun 2023)

Tarikh	Tajuk	Bil.
7 Julai 2023M/ 18 Zulhijjah 1444H	Khutbah AADK: Dadah Dijauhi, Negara Harmoni	1.
14 Julai 2023M/ 25 Zulhijjah 1444H	Sempena Awal Muharram: Hijrah Nabi	2.
21 Julai 2023M/ 3 Muharram 1445H	Istighfar: Penyuci Diri	3.
28 Julai 2023M/ 10 Muharram 1445H	Isteri Amanah Suami: Usah Khianati	4.
Khutbah Kedua		

دبیایاء:



زكاة فولاو فينغ

دترييتكن:



جابتن حال إحوال اڬام اسلام فولاو فينغ

***Jawatankuasa Panel Semakan Teks Khutbah
Negeri Pulau Pinang***

- 1. SS Dato' Seri Dr. Haji Wan Salim bin Wan Mohd Noor
(Pengerusi)**
Mufti Kerajaan Negeri Pulau Pinang
- 2. Y.Bhg Dato' Rosli bin Othman**
Ahli Jawatankuasa Fatwa Negeri Pulau Pinang
- 3. Prof. Madya Dr. Atikullah bin Abdullah**
Pensyarah, Pusat Pengajian Ilmu Kemanusiaan,
Universiti Sains Malaysia
- 4. Ustaz Ahmad bin Hashim**
Ketua Pusat Pengajian Tahfiz Al-Quran,
Kolej Islam Teknologi Antarabangsa Pulau Pinang (KITAB)
- 5. Ustazah Rohayati binti Daud**
Mantan Penyelaras Program Intervensi Kaunseling,
Universiti Sains Malaysia
- 6. Ustaz Mohd Salmi bin Shaimi**
Ahli Jawatankuasa Fatwa Negeri Pulau Pinang
- 7. Ustaz Subki bin Mohamed**
Mantan Pensyarah, IPG Kampus Tuanku Bainun
- 8. Ustaz Mohd Hanif bin Omar @ Wahab
(Setiausaha)**
Ketua Penolong Pengarah, Bahagian Dakwah
Jabatan Hal Ehwal Agama Islam Pulau Pinang (JHEAIPP)





Khutbah AADK:

DADAH DIJAUHI, NEGARA HARMONI

7 Julai 2023M/ 18 Zulhijjah 1444H

الْحَمْدُ لِلَّهِ الْقَائِلُ : وَأَنْفِقُوا فِي سَبِيلِ اللَّهِ وَلَا تُلْقُوا بِأَيْدِيكُمْ إِلَى التَّهْلُكَةِ وَأَحْسِنُوا
إِنَّ اللَّهَ يُحِبُّ الْمُحْسِنِينَ ﴿١٩٥﴾
أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ مُحَمَّدًا عَبْدُهُ وَرَسُولُهُ.
اللَّهُمَّ صَلِّ وَسَلِّمْ عَلَى مُحَمَّدٍ وَعَلَى آلِهِ وَأَصْحَابِهِ وَمَنْ تَبِعَهُ إِلَى يَوْمِ الدِّينِ.
أَمَّا بَعْدُ، قَالَ اللَّهُ تَعَالَى فِي كِتَابِهِ الْعَزِيزِ، يَا أَيُّهَا الَّذِينَ ءَامَنُوا اتَّقُوا اللَّهَ حَقَّ تُقَاتِهِ
وَلَا تَمُوتُنَّ إِلَّا وَأَنْتُمْ مُسْلِمُونَ ﴿١٩٢﴾

PARA TETAMU JUMAAT YANG DIKASIHI SEKALIAN,

Bertaqwalah kita kepada Allah **سُبْحَانَهُ وَتَعَالَى** dengan sebenar-benar takwa. Sesungguhnya orang yang paling mulia di sisi Allah ialah orang yang paling bertaqwa. Mudah-mudahan kita menjadi insan yang sentiasa mengingati Allah dan melaksanakan segala suruhan-Nya serta meninggalkan segala larangan-Nya, agar kita beroleh kejayaan dan kesejahteraan di dunia dan di akhirat.

Sebelum melanjutkan bicara, suka khatib memberi peringatan. Marilah kita tinggalkan perkara lagha yang bertentangan dengan sunnah serta adab, iaitu tindakan yang memesongkan perhatian daripada mendengar khutbah dan isi



kandungannya. Ini termasuklah perbuatan berbual-bual, tidur dengan sengaja, bermain telefon bimbit dan menggerakkan tabung masjid. Mimbar pada hari ini akan membicarakan khutbah bertajuk: **“Dadah Dijauhi, Negara Harmoni.”**

SIDANG JUMAAT YANG DIRAHMATI ALLAH SEKALIAN,

Penyalahgunaan dadah merupakan isu yang serius dalam negara kita kerana kesannya bukan sahaja kepada individu terlibat malah mampu melumpuhkan sesebuah negara. Lantaran itu, dadah telah diisytiharkan sebagai musuh utama negara sejak tahun 1983. Ini kerana penyeludupan, pengedaran dan penyalahgunaan dadah memberi ancaman kepada sistem sosial, ekonomi dan keselamatan negara. Oleh itu, kita semua perlu berganding bahu dan bersepakat untuk mengatasi masalah ini hingga ke akar umbi.

Sesungguhnya penyalahgunaan dadah selain daripada memudharatkan diri, ia juga dilarang dari segi syarak dan undang-undang negara. Penyalahgunaannya boleh mendatangkan kesan-kesan negatif yang memudharatkan diri sendiri, keluarga, masyarakat dan negara. Firman Allah **سُبْحَانَهُ وَتَعَالَى** dalam Surah al-Baqarah ayat 195:

.... وَلَا تُلْقُوا بِأَيْدِيكُمْ إِلَى التَّهْلُكَةِ وَأَحْسِنُوا إِنَّ اللَّهَ يُحِبُّ الْمُحْسِنِينَ ﴿١٩٥﴾

Maksudnya: *“Dan janganlah kamu sengaja mencampakkan diri kamu ke dalam kebinasaan dengan tangan sendiri, dan*

berbuat baiklah. Sesungguhnya, Allah menyukai orang-orang yang berbuat baik.”

SIDANG JUMAAT YANG DIRAHMATI ALLAH SEKALIAN,

Penyalahgunaan dadah memperlihatkan perubahan *trend* yang semakin ketara iaitu daripada penggunaan dadah jenis organik seperti ganja dan heroin kepada dadah *sintetik* seperti *syabu*, pil kuda, *ekstasi* serta penyalahgunaan bahan seperti gam, petrol, najis binatang dan sebagainya.

Agensi Anti Dadah Kebangsaan (AADK) melaporkan bahawa sehingga September 2022, jumlah penagih dadah sebanyak 129,092 orang dengan peningkatan sebanyak 14.5% berbanding tempoh yang sama pada tahun 2021. Apa yang membimbangkan daripada jumlah tersebut, 83.4% atau 107,633 orang adalah beragama Islam. Ini ditambah dengan penagihan yang melibatkan kategori umur belia belasan tahun.

SIDANG JUMAAT YANG DIRAHMATI ALLAH SEKALIAN,

Marilah kita renung bersama, apakah yang akan berlaku sekiranya jumlah ini semakin bertambah? Ia menjadi lebih serius apabila anak-anak terbiar akibat ibu bapa terlibat dengan penagihan, keluarga terancam kerana tidak mampu berfungsi dengan sewajarnya, bahkan masyarakat berantakan kerana sistem sosial dan politik yang tidak teratur. Peningkatan jumlah penagih dadah ini turut memberi kesan negatif terhadap kestabilan negara kita pada masa akan

datang. Senario sedemikian akan merosakkan generasi masa hadapan.

Ibu bapa, anak-anak dan keluarga yang berhadapan dengan masalah penagihan dadah akan mengalami tekanan emosi seperti rendah diri, kemurungan, berasa diri disisihkan serta menimbulkan stigma atau gambaran buruk dalam diri mereka akibat diskriminasi yang dihadapi. Jika keadaan ini berterusan akan menyebabkan mereka tidak produktif serta tidak dapat memainkan peranan sebenar sebagai anggota keluarga, masyarakat dan negara.

Kesan negatif daripada penagihan ini juga turut menimbulkan konflik dalam masyarakat serta meningkatkan kes-kes jenayah. Sebagai contoh, pada 16 Januari 2022 yang lalu kita dikejutkan dengan peristiwa seorang ibu telah dipenggal kepala oleh anaknya yang disahkan positif dadah.

Inilah antara kesan buruk akibat penyalahgunaan dadah. Suasana kehidupan masyarakat tidak tenteram, terancam dan struktur komuniti menjadi kucar-kacir. Ini akan mengurangkan interaksi dalam masyarakat dan kehilangan daya tahan untuk menghadapi cabaran dan ancaman. Akhirnya komuniti di kawasan tersebut kurang berupaya serta tidak mampan dari segi kemajuan dan pembangunan.

Sememangnya kita perlu menyedari dan mengambil tahu bahawa penyalahgunaan dadah memberi kesan negatif dari segi sosial yang menyebabkan keretakan sesama anggota

keluarga, rakan-rakan dan komuniti. Manakala dalam aspek ekonomi pula akan menggagalkan usaha pembangunan negara ke arah mencapai status negara maju serta akhirnya akan merugikan negara.

SIDANG JUMAAT YANG DIKASIHI ALLAH,

Hampir empat dekad lamanya AADK melaksanakan pencegahan, penguatkuasaan dan rawatan pemulihan individu yang terjebak dengan masalah penagihan dadah di negara ini. Tidak sewajarnya diserahkan bulat-bulat kepada AADK semata-mata tetapi ia perlu diperjuangkan secara bersama dan berterusan. Ini bersesuaian dengan tema peringatan hari Anti Dadah Kebangsaan pada tahun ini iaitu **"Lebih Baik Cegah"**. Semua pihak sama ada individu, kumpulan, keluarga, majikan, pemimpin masyarakat, pertubuhan-pertubuhan dan jabatan-jabatan kerajaan perlu memainkan peranan dan tanggungjawab dalam memastikan masyarakat bebas daripada dadah.

Sebagai individu, kita yang mempunyai keluarga hendaklah memainkan peranan untuk memastikan ahli keluarga tidak terlibat dalam penyalahgunaan dadah. Hubungan kekeluargaan perlu dieratkan, pantau pergerakan dan pergaulan anak-anak dan ahli keluarga serta ambil tahu setiap aktiviti yang dilakukan oleh mereka agar terhindar daripada terjerumus dengan permasalahan dadah dan sosial. Sabda Rasulullah ﷺ :

كُلُّكُمْ رَاعٍ وَمَسْئُولٌ عَنْ رَعِيَّتِهِ، فَالْإِمَامُ رَاعٍ وَهُوَ مَسْئُولٌ عَنْ رَعِيَّتِهِ وَالرَّجُلُ فِي أَهْلِهِ رَاعٍ، وَهُوَ مَسْئُولٌ عَنْ رَعِيَّتِهِ

Maksudnya: "Setiap daripada kalian adalah pemimpin dan bertanggungjawab terhadap pimpinannya, seorang imam (ketua negara) adalah pemimpin dan dia bertanggungjawab terhadap rakyatnya dan seorang lelaki dalam keluarga adalah pemimpin dan bertanggungjawab terhadap pimpinannya (ahli keluarganya)." (Hadis Riwayat al-Bukhari)

Institusi pendidikan juga perlu memainkan peranan penting dalam membendung gejala ini. Para pelajar hendaklah diberi kesedaran tentang bahaya penyalahgunaan dadah sejak awal persekolahan lagi. Seterusnya mereka hendaklah dididik dan dibantu untuk menghindari kegiatan yang hina ini yang jelas haram di sisi syarak. Perkasakan kempen-kempen bahaya penyalahgunaan dadah melalui pendekatan ceramah, latihan dalam kumpulan, kelompok sokongan, perjumpaan-perjumpaan dengan pemimpin-pemimpin masyarakat yang berpengaruh, pameran interaktif dan sebagainya. AADK sentiasa bersama dengan institusi pendidikan dalam mewujudkan persekitaran yang selamat daripada penyalahgunaan dadah.

KAUM MUSLIMIN SIDANG JUMAAT YANG BERBAHAGIA,

Majikan juga perlu menggalas tanggungjawab untuk memberi pendidikan, kesedaran dan menyelia para pekerja agar tidak terlibat dengan penyalahgunaan dadah. Penglibatan pekerja dalam masalah penagihan dadah pasti

akan memberi kesan kepada produktiviti, keselamatan dan mencalarakan imej organisasi dan negara. Oleh itu, majikan perlu memastikan persekitaran kerja yang kondusif dan membantu pekerja yang mempunyai masalah penagihan dadah untuk disalurkan rawatan dan pemulihan sewajarnya. Ini bukan sahaja untuk membantu organisasi tetapi juga mewujudkan masyarakat sejahtera dan selamat.

Anggota masyarakat adalah rakan strategik utama kepada AADK, Polis Diraja Malaysia (PDRM), pihak berkuasa tempatan (PBT), Badan Bukan Kerajaan (NGO) dan institusi kegamaan untuk menangani masalah penyalahgunaan dadah. Bantulah individu yang terlibat dengan memberi sokongan moral agar mereka segera mendapatkan rawatan dan pemulihan yang sewajarnya. Kita perlu menerima dan jangan sekali-kali menyisihkan mereka yang telah pulih kerana mereka juga mampu memberi sumbangan kepada masyarakat. Bantulah untuk mengurangkan diskriminasi kepada bekas-bekas penagih dan ahli keluarganya.

SIDANG JUMAAT YANG DIRAHMATI SEKALIAN,

Antara intisari yang boleh dijadikan pedoman melalui khutbah pada hari ini ialah:

Pertama: Institusi kekeluargaan yang harmoni dan prihatin mampu menghindarkan individu daripada terjebak ke kancah penyalahgunaan dadah;

Kedua: Anggota masyarakat perlu sama-sama menggalas tanggungjawab dan saling bekerjasama dalam memastikan kesejahteraan dan keharmonian serta terpelihara daripada anasir negatif di persekitarannya; dan

Ketiga: Penyertaan semua pihak sangat perlu dalam mengambil cakna terhadap komuniti setempat.

Firman Allah dalam Surah at-Tahrim ayat 6:

يَا أَيُّهَا الَّذِينَ ءَامَنُوا قُوا أَنْفُسَكُمْ وَأَهْلِيكُمْ نَارًا وَقُودُهَا النَّاسُ وَالْحِجَارَةُ عَلَيْهَا مَلَائِكَةٌ غِلَاظٌ شِدَادٌ لَا يَعْصُونَ اللَّهَ مَا أَمَرَهُمْ وَيَفْعَلُونَ مَا يُؤْمَرُونَ ﴿٦﴾

Maksudnya: *"Wahai orang-orang yang beriman, peliharalah diri kamu dan keluarga kamu dari api neraka yang bahan-bahan bakarnya adalah manusia dan batu; neraka itu dijaga dan dikawal oleh malaikat-malaikat yang keras kasar (layanannya), mereka tidak menderhaka kepada Allah dalam segala yang diperintahkan kepada mereka dan mereka pula tetap melakukan segala yang diperintahkan."*

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِهِدْيِ سَيِّدِ الْمُرْسَلِينَ، أَقُولُ مَا سَمِعْتُمْ، وَأَسْتَغْفِرُ اللَّهَ لِي وَلَكُمْ، وَلِسَائِرِ الْمُسْلِمِينَ مِنْ كُلِّ ذَنْبٍ، فَاسْتَغْفِرُوهُ، إِنَّهُ هُوَ الْغَفُورُ الرَّحِيمُ.



Khutbah Kedua Bulan Julai

2023M/ 1444/14445H

الْحَمْدُ لِلَّهِ عَلَى أَلَايِهِ وَإِحْسَانِهِ، وَالشُّكْرُ لَهُ عَلَى تَوْفِيقِهِ وَامْتِنَانِهِ،
وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ تَعَظِيمًا لِسَانِهِ،
وَأَشْهَدُ أَنَّ مُحَمَّدًا عَبْدُهُ وَرَسُولُهُ دَاعِيًا إِلَى رِضْوَانِهِ.
صَلَّى اللَّهُ وَسَلَّم عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ، عَدَدَ خَلْقِهِ وَرِضَا نَفْسِهِ،
وَزِينَةَ عَرْشِهِ وَمِدَادَ كَلِمَاتِهِ.
أَمَّا بَعْدُ، فَيَا عِبَادَ اللَّهِ، اتَّقُوا اللَّهَ تَعَالَى رَبَّكُمْ حَقَّ تَقَاتِهِ، وَاعْمَلُوا بِطَاعَتِهِ
وَمَرْضَاتِهِ، ثُمَّ اْعْلَمُوا أَنَّ اللَّهَ سُبْحَانَهُ وَتَعَالَى أَمْرُكُمْ بِأَمْرٍ بَدَأَ فِيهِ بِنَفْسِهِ؛ فَقَالَ عَلِيمًا
حَكِيمًا:

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا

﴿الأحزاب: 56﴾

اللَّهُمَّ صَلِّ وَسَلَّم عَلَى عَبْدِكَ وَرَسُولِكَ مُحَمَّدٍ الْبَشِيرِ النَّذِيرِ، وَالسَّرَاجِ الْمُنِيرِ،
وَارْضَ اللَّهُمَّ عَنْ آلِهِ وَصَحَابَتِهِ أَجْمَعِينَ، وَعَنِ التَّابِعِينَ، وَمَنْ تَبِعَهُمْ بِإِحْسَانٍ
إِلَى يَوْمِ الدِّينِ، وَعَنَّا مَعَهُمْ بِعَفْوِكَ وَكَرَمِكَ وَإِحْسَانِكَ يَا أَرْحَمَ الرَّاحِمِينَ.

اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ
وَالْأَمْوَاتِ،

اللَّهُمَّ آمِنَّا فِي أَوْطَانِنَا، وَأَصْلِحْ وَاحْفَظْ أئِمَّتَنَا وَعُلَمَاءَنَا وَوُزَرَائِنَا وَوُلَاةَ أُمُورِنَا.

اللَّهُمَّ وَفِّقْهُمْ لِمَا فِيهِ عِزُّ دِينِكَ وَنَصْرُ شَرِيعَتِكَ، اللَّهُمَّ اجْعَلْهُمْ هُدَاةً مُهْتَدِينَ
صَالِحِينَ مُصْلِحِينَ وَاشْمَلِ اللَّهُمَّ بِعِنَايَتِكَ وَتَوْفِيقِكَ عَلَى صَاحِبِ الْجَلَالَةِ،



Kebawah Duli Yang Maha Mulia Seri Paduka Baginda Yang di-Pertuan Agong, Al-Sultan Abdullah Ri'ayatuddin Al-Mustafa Billah Shah Ibni Almarhum Sultan Haji Ahmad Shah Al-Musta'in Billah dan Kebawah Duli Yang Maha Mulia Seri Paduka Baginda Raja Permaisuri Agong, Tunku Azizah Aminah Maimunah Iskandariah Binti Almarhum Al-Mutawakkil Alallah Sultan Iskandar Al-Haj;

وَكَذَلِكَ صَاحِبِ الْفَخَامَةِ،

Tuan Yang Terutama, Tun Dato' Seri Utama Ahmad Fuzi Bin Haji Abdul Razak, Yang di-Pertua Negeri Pulau Pinang.

اللَّهُمَّ ادْفَعْ عَنَّا الْبَلَاءَ وَالْوَبَاءَ وَالْغَلَاءَ وَالرِّيَاءَ، وَالرَّبَا وَالرَّنَا وَالزَّلَازِلَ وَالْمِحْنَ وَسُوءَ الْفِتَنِ مَا ظَهَرَ مِنْهَا وَمَا بَطَنَ عَنْ بَلَدِنَا هَذَا خَاصَّةً، وَعَنْ سَائِرِ بِلَادِ الْمُسْلِمِينَ عَامَّةً يَا رَبَّ الْعَالَمِينَ.
اللَّهُمَّ إِنَّا نَعُوذُ بِكَ مِنَ الْبَرَصِ وَالْجُنُونِ وَالْجُدَامِ وَمِنْ سَيِّئِ الْأَسْقَامِ، يَا أَرْحَمَ الرَّاحِمِينَ.

Ya Allah! Dengan sifat-Mu yang Maha Pemurah dan Maha Mendengar, jadikanlah kami dan keturunan kami orang-orang yang istiqamah mendirikan solat secara berjemaah serta mengeluarkan zakat dan melaksanakan waqaf melalui agensi milik penuh Majlis Agama Islam Negeri Pulau Pinang (MAINPP) iaitu Zakat Pulau Pinang (ZPP) dan Wakaf Pulau Pinang (WPP). Semoga sumbangan 10% daripada hasil kutipan Tabung Jumaat mingguan dari setiap masjid kepada Tabung Wakaf yang telah ditubuhkan, menjadi saham yang berkekalan manfaatnya, di dunia dan akhirat.

Ya Allah! Berilah petunjuk-Mu kepada kami dan pemimpin-pemimpin kami untuk memberikan khidmat bakti yang terbaik kepada agama, bangsa dan negara. Ya Allah! Kuatkan iman kami agar dapat menghindari perbuatan khianat, salah guna kuasa dan harta,



memberi atau menerima rasuah dan segala perbuatan durjana yang merosakkan kepentingan agama, masyarakat dan negara.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ.

عِبَادَ اللَّهِ! إِنَّ اللَّهَ يَأْمُرُ بِالْعَدْلِ وَالْإِحْسَنِ وَإِيتَايَ ذِي الْقُرْبَى وَيَنْهَى عَنِ الْفَحْشَاءِ وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ ﴿١٠﴾ فَادْكُرُوا اللَّهَ الْجَلِيلَ يَذْكُرْكُمْ،
وَاشْكُرُوهُ عَلَى نِعَمِهِ يَزِدْكُمْ، وَلَذِكْرُ اللَّهِ أَكْبَرُ وَاللَّهُ يَعْلَمُ مَا تَصْنَعُونَ ﴿١٥﴾